



大明
仁孝
皇后

勸善書

萃拔

三

□ 9
3328
3



5328
3

卷之九目錄
▲嘉言 有書不教子孫愚

一食肉僧誦經口發光事

二延壽對普賢像取禪定誦經二闖得誦經之闖事

三南岳大師十年專誦等事
又先身坐禪為賊斬首事

四智瓌降鬼勇猛行法華事

又九頭龍從地出升空表瑞事

五法華讀誦僧之死尸從口生蓮華兩本事

六誦經之人現感金殿事

又口放光非戒正緣眾見喧闐因止之不說授事

七雉聞經生人出家為師付弟事



去五味均平戲



- 八姑授經於嫂蓮根萌姑口蓮華生嫂口事
- 九誦經女人船覆不沒至岸事
- 十誦經功德忽然得船渡江事 又猛獸還防護事
- 十一女使口實誦青蓮華香等句墓所生蓮華事
- 十二尼搵持誦法華十萬部死後從舌根生青蓮華事
- 十三華手尼誦法華掌上瓜上皆生一華事
- 十四玄光入龍宮講談七日然人謂舟泛不進半日事

卷之十目錄
 ▲嘉言 吾每讀聖賢書未嘗不肅敬對之

- 一敬重聖賢故紘子孫般榮之事
 - 二誦陀羅尼品現感十羅刹女擁護事 付頭破七
 - 三分如阿梨樹枝事
 - 三臯亭神捨祠為寺事
 - 四狗依咒願生人出家修道事
 - 五福薄德微者受妙供隨畜生事 鶴勒那因緣
- 卷之十一
 ▲嘉言 若有陰德者必饗其樂
- 一除人短命之禍得自長壽福之事
 - 二救飢民子孫光榮事
 - 三寡女祠宅中古塚得報事 又古塚經年靈在其中事
 - 四

- 四 飼燕子人死驚共入墓死事
- 五 造舟渡人濟危轉短得壽事
- 六 普施藥於人現登仙事
- 七 施藥濟人登仙還值十世孫事
- 八 好道愛客得報事
又養惡瘡人遂得仙術事 又得仙上天事
- 九 身病易治心病難治事
又心僻君主旁列藏府僻內輔事
- 十 生時宿胎內死即產出事
- 十一 衣食有地皆由前世種因事
- 十二 十三開井渡橋造路功報事

- 十四 放婢施窮轉短得壽事
- 十五 有慈悲濟人憂生福子事
▲嘉言 以公滅私民其允懷
一 教明於上民有耻心爭自息事
又民從於化鳥獸亦服事
又以仁治處災自不至事
- 二 仁心誓約祭之鱷魚自徙民除災事
- 三 料簡罪輕重且留重放輕事
- 四 合浦珠大守貪則去不貪還事
▲嘉言 為官刑獄為要治獄寬恕為先
- 一 刑罰無罪其地早飭事

又于公高門子孫受福事

二父慎刑子必昌事

三子報父怨愍志赦之事 又活於子亡親來報事

▲嘉言 節身時食清淨自活

一郡守無貪泛舟不載貨神人護之風波難免之事

二忘貧樂道天授福貴事

▲嘉言 君子謀道不謀食

一見伏藏不取不言後登顯官事

又伏藏取之造佛寺子孫必昌事

二見錢財不取唯祈子學事 又母賢子隨賢事

三雖拾他財不取還之事

又無貪者見之賢讚愚誦事

四州守任滿歸唯有旗一聯事

又旗書公廉兩字只天知風來旗即登天事

五拾得他財還之果有大顯事

六婢使有忠感無二心捨金釵放令嫁事

又濟他死自還活事

卷之十二 ▲嘉言 活千人者子孫必封

一雖領百萬之衆妄不殺一人事

又妄不殺人子孫必昌事

三捨身活臨危難之人報之事

四救幼主害我身遂榮顯事

▲嘉言三子免 適而改之是不過也

一 父好殺生所產子皆短命事
又誓止殺得成人子事

二 常殺牛食肉牛反成人來歎事

三 盜僧物現成餓鬼悔罪免事

四 被虎皮威人奪物皮著身成布事
又悔罪虎皮即落複入身事

五 多殺鳥獸現身頭反成鳥獸事

六 賊為免害入佛寺為沙門因佛教成羅漢事

七 自口吐鳥獸肉皆見複本形因止殺生事

八 侵用僧物冥官白日來責之事

▲嘉言四石 欲不匱則博施

一 貧女見鑄佛像施一錢其錢顯像胸事

二 幼女以慈心乞食癩人與於茶得壽福事

三 昔瓶入水水中置一錢上覆鏡今於井水得自然福事

四 昔持不殺戒施一錢今入水魚吞割魚皆不死剩得二家父母事

五 昔貧人賣薪得兩錢供佛九十一劫恒捲金錢財寶自然事

六 昔三人共僧施一錢今於三處各得金受福事

七 昔以一金錢施佛塔今金錢在手中隨取隨生事

八 九僧坐聖僧上座受且越施過罪事 又佛法中
剃髮染衣非端嚴唯得四果為端嚴事 又聚沙
為佛塔免危難事

九 貧人以石擬珠散眾僧得七寶自然果報事

十 貧人盡得三十兩金盡施僧事 又難得之物盡
施福最多事 又穀子未種第已得生事 又昔
不施故今貧今不施後亦貧事

十一 昔佛及僧各施衣一領今所生時身被袈裟值
佛開悟事

十二 須達長者愍諸貧人自往處處勸化令供於佛
事 又貧女脫一衣施與之須達聞裸形脫上服

遺之貧女得福生天事

十三 昔得柰一果施佛死生天事

又生生不由胞胎今生柰華中事

十四 供養道人得一銅瓶忘誠失瓶轉貧事

十五 以一飯施緣覺七反生天王七反生人王事

十六 有長者忽得餓鬼報處處求水不得事 又行

淨水使眾僧 又受佛教常於眾中行淨水免餓

鬼報事 牙齒間流八功德水事

十七 造長幡供佛塔每生天上人中常有太幡覆其

上事

十八 以一樵木供佛十三劫常生人天受快樂後成

十 辭支佛事

十九 昔有貧乏父母子等六人採采繫命各一心施
十 道人等受福報事

二十 悟解絕倫昔缺人緣今寡徒侶事

又施食於飛走求得法侶事

二十一 浴眾僧取其浴水用洗惡瘡即得愈事

又眾僧施浴水得端嚴身事

又阿難端正身往因之事

二十二 登仙之人無布施之功故來人間償其願事

付仙術事

二十三 本無水處瘡疾人來一女子愍之與水瘡人

忽開井報之事

二十四 生天仙之人故來人間普施藥償微謹事

大明仁孝皇右勸善書卷九之十二拔書

嘉言

儒觀書一卷則有一卷之益觀書一日則有一日之

益○有田不耕倉廩虛有書不教子孫愚○不登高

山不知天之高也不臨深谿不知地之厚也不聞先

王之遺言不知學問之大也釋能於釋迦牟尼佛法

中受持讀誦為他人說所得福德無量無邊道燒香

行禮晨夕誦經棄諸雜想心注太真冠得玄降白日
飛騰

感應

①唐上元中洛州敬愛寺有律僧歸觀及鄭州果迫
暮投店次有僧至不知其名並房安泊其後來僧謂
主人曰貧道疲餒酒酤三升肉買一介飲敢追盡律
師怒而訶之身披法服恣噉酒肉不知慙愧其僧默
而不答少頃索水漱口端身趺坐緩發梵音誦大方
廣佛華嚴經入如是我聞至寂滅道場其僧口角兩
邊俱發明光透射房舍洎至三更猶聞誦經聲聲不
絕光明轉盛誦至六帙即歇收光其僧乃卧天明律

師涕泣懺過輕謗聖賢願罪消滅

②周僧延壽字冲玄總角誦法華經五行俱下六旬
而畢投四明翠岩禪師出家衣不繒纈食無重味復
往參韶國師發明心要嘗謂曰汝與元師有緣他日
當大作佛事惜吾不及見耳初往天台智者巖九旬
習定有鳥尺鴳巢於衣衾古得切後於國清行法
華懺夜見神人持戟而入師訶之曰何得擅入對曰
久積善業方到此中夜半遶像見普賢前蓮華在手
遂上智者巖作二闍一曰一生禪定二曰誦經萬善
莊嚴淨土乃真心精禱得誦經萬善闍乃至七度於
是一意專脩淨業振錫金華天柱峯誦經三載禪觀

中見觀音以甘露灌其口遂獲辯才初演法於雪竇
寺建隆元年忠懿王請住靈隱二年遷永明日課一
百八事未嘗輒廢學者參問指心為宗以悟為則日
暮往別峯行道念佛旁人聞螺貝天樂之聲忠懿王
嘆曰自苦求西方者未有如此之專功也乃為立西
方香嚴殿以成其志居永明十五年弟子一千七百
人常與眾受菩薩戒夜施鬼神食晝放生命皆悉回
向莊嚴淨土時人號為慈氏下生開寶八年二月二
十六日晨起焚香告眾跏趺而化

③陳僧慧思武津李氏子幼立志持戒日唯一食不
受別供十年專誦法華經七載常行方等九旬常坐

脩一行三昧續詣北齊慧文禪師所諮稟禪法長夏
攝心夏滿受歲慨無所證放身倚壁背未至間豁然
開悟法華三昧及餘大小法門後止光州大蘇山道
俗福施造金字般若金字法華眾請講二經即與敷
叙莫非幽曠次至南嶽見林泉竦淨乃曰此古寺基
也依言掘之果獲殿趾器皿又往巖下乃曰吾先世
在此坐禪為賊斬首由此命終又今世也僉共尋覓
乃得枯骸師得而頂戴因起塔以報昔恩陳宣帝詔
住棲玄寺道俗顯仰忽有普賢摩頂涌生肉髻常往
瓦棺遇雨不濕履泥不汗或現身大小或寂爾藏身
瓶水常滿若有天童給侍臨終日大集門學說法唱

言衆聖相近泯然命終感異香滿室遠近咸聞時太
建元年也

④隋僧智瓌姓張氏清沂人年十七亡二親染患至篤知無生意夜忽見月遂念月光菩薩因而得差深知三寶是我依憑即往安淨寺出家挺志高邁言行俱實逖聞智者悟解起群遂抵台嶺服膺受道智者察其根器乃遣行法華三昧泊脩至二七初夜坐禪乃見一九頭龍從地涌出上升虛空耳又嘗於寶林寺脩法華三昧啓脩初夜如有人來搖動戶扇瓌師問之答曰我來看燈耳頻經數過答問如前寺有慧成禪師聞其事而言曰彼堂內從來有大惡鬼今聞

此聲是必相害也天曉扣戶問之見其猶在甚喜成因以報永陽王王即遣數十兵吏執杖防護瓌曰命由業也豈在防護謝而去之至第二夜鬼即入來徧打東西於三七日恒爾爲惱瓌坦然無懼行法將訖見一青衣童子稱讚善哉言已不見

⑤晉建興二年長沙縣西一百餘里有青蓮華兩本生於陸地道俗爭觀因掘其地一丈二尺得一瓦棺而蓮出於棺之壞處斲棺視之有髑髏拴索其蓮根生於齒頰間時有說者曰昔有僧不知名氏誦蓮經十萬部不疾而化遺言使衣紙服以瓦爲棺此其是矣

六晉僧登師者止匡廬大林寺通誦法華晝夜不息
一日忽見空中有一銀殿漸下於房忽變成金殿師
遂入殿坐起經行如是三載安王聞之累詔奉迎因
輓下山王與四衆嚴持香華從師乞戒登曰白日喧
雜心多散亂當於清夜受之至夜正說戒相三歸依
時師之口吻放光明徧照大衆衆見光明競拜喧闐
師即不語光便收斂師云本欲受戒那得見光喧闐
光現但是受戒祥瑞未是得戒正緣今更從初大衆
默然師又說法還復放光衆又喧闐因而且止明日
再來師即辭別歸山所現金殿還復如故一日忽謂
門人曰今登金殿不復廻也即於是日倏然超化

七晉僧法志結菴餘杭山誦法華經朝夕不懈有雉
巢于菴之側每聞誦經聲則翔集於座傍若侍立聽
受狀如是者七年一日憔悴師撫之曰汝雖羽族而
能聽經苟脫業軀必生人道明且遽殞師即瘞之及
夜方假寐夢童子再拜曰我即雉也因聽師誦經得
脫羽類今生於山前王氏家為男子右腋猶有雉毳
見可驗也僧詰朝至其家問之果然王氏一日設齋
志方踵門此子遽然曰我和尚來也舉衆異之攜以
示志志撫之曰此我雉兒耳遂解衣周視其腋下果
有雉毳志曰至七歲宜聽出家父母唯之至時入山
十六落髮以腋有毳命云曇翼授與蓮經不遺一字

志師歸寂翼即爲此山第二祖矣

八唐淮寧近城河北岸有華臺寺其始乃一大姓家有室女能誦法華經其兄娶妻心亦樂學未幾姑與嫂俱能皆誦每至更闌夜靜月白風清二人同聲以誦雖世之憂玉鏘金無以並其韻矣一時病姑嫂併殂異日嫂墓忽生紅蓮一朵開敷妙盛人悉異之啓看乃見蓮根自嫂之口連貫姑墓又發姑墓其根蓋出于姑之舌本焉蓋嫂之經從姑以授表相因由也

九唐武德中都水使蘇長授巴州刺史帶家族赴官因渡嘉陵江中流風作船帆傾沒男女六十餘人一時喪失唯一女使常讀法華經浪入船中女乃頭戴

經函誓與俱沒既而女即不沉隨波泛泛頃刻至岸捧函而上開視其經了無沾濕此女後嫁於揚州其篤信讀誦愈於舊也

十隋僧智聰住揚州白馬寺專習三論尋渡江住安樂寺值隋國亡思歸無計隱江荻中誦法華經七日不飢恒有四虎馴遶聰曰吾已十日不食命在呼吸間卿可食之虎作人言曰造夫立地無有此理忽見一老翁腋下挾一小船來曰師欲渡江即上船其四虎見而淚出聰曰持危拔難正在今日即同四虎利涉南岸船及老人忽然不見聰領四虎止西霞寺塔西經行禪誦誓不寢卧安衆八十餘人若有凶事卽

來大吼由此警覺至貞觀中年九十九於佛降生日
熏鑪徧禮聖像還歸于靜室端坐而化

士宋紹興末奉化縣有姓趙人其母平日重佛齋戒
誦法華經房下有一女使每竊聽久久忽記得四句
所謂青蓮華香白蓮華香華樹香果樹香自此動靜
施爲常吟咏不絕人聞之謂爲咲語殊不知此女亦
有用心處一日作事乖主意箠楚至死遂以其屍潛
瘞後園異時忽於其上秀出青蓮華一朵香色可愛
餘人不知其因獨趙母默而識之蓋所誦四句經感
應之如是也趙母復不匿其德密說與虛堂法師本
空空每舉此以化人

士梁尼諱道蹟號忽持不知何許人得法於菩提達
磨道居湖州下嶺之頂峯晝夜誦法華經滿十萬部幾
二十年不下山後歸寂塔全身於結廬之所至大同
元年塔內忽有青蓮華一朵道俗異之因啓看見尼
肉身不壞其華從舌根生又於中獲蓮經一部州郡
錄實表奏勅置法華寺

士陳華手尼高郵縣人志節霜淨言行冰清誦法華
不捨晝夜初誦一卷忽於右手爪上生一華狀如綾
絲次第誦至第五五指爪上皆生一華誦徹六七掌
上併生二華大適爪上由是聲傳帝闕陳武帝召入
看之從此郡人競呼爲華手尼

④陳僧玄光海東熊州人少厭俗塵專脩梵行泊長
 遂越滄溟求中國禪法於是往衡山參思大禪師思
 察其根器授以四安樂行俄證法華三昧返錫江南
 附舟至于大洋偶見彩雲雅樂絳節而至空中聲曰
 天帝召海東玄光禪師於龍宮說親證法門光拱手
 避讓唯見青衣前導尋入宮城不類人間官府無非
 鱗介鬼神既登寶殿次陟高臺如問而談者九七日
 事畢王躬送別光復登舟人謂泛洋不進者半日而
 已

卷之十拔書

嘉言

儒吾每讀聖賢書未嘗不肅敬對之其故紙有五經
 詞義及聖賢姓名不敢他用也○借人典籍皆須愛
 護凡有缺壞就為補治此亦士大夫百行之一也○
 讀書起家之本循理保家之本○**禮**咒是三世諸佛所
 說若能至心受持無不靈驗○**道**敬奉三寶口誦尊經
 一切莊嚴真法智慧不可思議

感應

①宋王文正公曾父平昔見故紙遺墜必掇拾洗以
 香水收之一夕夢宣聖拊其背曰汝何敬重吾字之

勤也恨汝老矣無可成就他日當令曾參來汝家受
生顯大門戶時曾母有孕及期因得此夢次日果生
一男遂命名為曾後狀元及第此則敬重聖賢字紙
之報也

②昔僧寶通梵行精修長誦法華經陀羅尼品稍有
靈異時楊橋村有趙氏家妻為神所魅請通持咒通
既至神即現形通告曰神在村中合當興福如何反
魅於人神曰非弟子事此乃部下小鬼耳遂呼小鬼
至前責罰趙妻因此得差續後趙妻之病仍發歌吟
竟夕又告通通又去見所責鬼在病牀前通曰前曾
誠治那得再來汝若不去吾當誦咒令汝頭作七分

如阿梨樹枝也鬼叩頭求哀云不煩咒也從此病差
鬼不復至矣

③隨釋貞觀姓范錢唐人其母以誦藥師觀音求嗣
得師少有節操舌紫羅紋手現奇相誦法華經日終
一卷從師聽律超勝前輩後於弼隱山建南天竺寺
居焉常講法華以為心要每盥洗遺滴地不為濡人
皆異之一日臯亭神請講法華感神捨祠為寺有司
馬李子深請講涅槃至現病品夢二人把幡告云淨
居天遣迎續便卧疾夢與智者同蓋翼佛還山覺而
嘆曰昔謂六十二應終講法華力更延一紀今七十
四復致斯驗生期畢矣乃啟手足時聞空中伎樂之

聲至于中夜踟蹰而寂

四昔有一國穀米湧貴人民飢餓時有沙門入城分衛乞食周遍門室無所獲次至長者家乞食得麤惡飯適欲出城門中途一射獵屠兒抱一狗子持歸欲殺見沙門歡喜前為作禮沙門咒願老壽長生沙門知有狗子疑欲殺之故問其人今何所賣荅曰空行無所獲持沙門又問吾已見之何為藏匿殺生之罪甚為不善願持我食貿此狗子令命得濟卿福無量其人荅曰不能相與我故行求家門共食卿此小飯何所足乎沙門殷勤曉喻請之其人拔突不肯隨言沙門又言設不肯者可以示我其人即出以示沙

門沙門舉飯以飼狗子以手摩按音吻咒願淚出卿罪所致得是犬身不得自在見殺食噉使爾世世罪滅福生離狗子身得生為人所在遇法三寶自然狗子得食善心生焉踊躍歡喜知自歸依人將還家屠殺共食狗子命適即生豪貴大長者家適生墮地便有慈心時彼沙門分衛次到長者門裏分衛時長者子見彼沙門憶識本緣便前稽首禮沙門足請前供養百味飲食前白父母言今我欲逐此大和尚奉受經戒為作弟子父母愛重不肯聽之我全一門有汝一子當以續後家門之主何因使欲棄家而去小兒啼泣不肯飲食不欲聽我便自就死父母見然便聽

令去隨師學道除去鬚髮被三法衣諷誦佛經深解其義便得三昧度狗子經說

五昔鶴勒那名僧問二十二祖摩奴羅大士曰我有何緣鶴衆隨我祖曰汝昔嘗爲比丘赴會龍宮汝弟子衆咸欲隨從汝觀五百衆中無有一人堪受妙供時諸弟子曰師嘗說法於食等者於法亦等今旣不然何聖之有時即令其衆赴會是諸弟子福薄德微隨於羽族然已五劫今乃轉受鶴身曰以何方便令彼解脫祖曰我有無上法寶汝當聽受化未來際而說偈曰心隨萬境轉轉處實能幽隨流認得性無喜亦無憂時諸鶴衆聞偈俱得解脫飛鳴而去

卷之十一 拔書

嘉言

德惟德動天無遠弗届○德無常師主善爲師○君子成人之美不成人之惡○有陰德者必饗其樂以及子孫○仁勝凶邪德除不祥○瑞生必於嘉士福至實由善人○積土成山風雨興焉積水成淵蛟龍生焉積善成德神明自得聖心循焉○聲無小而聞行無隱而不彰玉在山而木潤淵生珠而崖不枯爲善不積邪安有不聞者乎○君子務脩其內而讓之於外務積德於身而處之以導道如是則貴名起之如日月天下應之如雷霆○爲善不求人知者謂

之陰德故其施廣其慧博天報必豐也○有陰德者其後必大○為人作善方便者其後受慧○積金以遺子孫子孫未必能守積善以遺子孫子孫未必能讀不如積陰德於冥冥之中以為子孫長久之計○已所不欲勿施於人釋道善於陰德報於顯○處心正直積累陰功感動冥昊○立德闇昧之中而慶彰萬物之上○開通道路興置橋梁一念善因受天人之快樂證佛祖之真源○曠路作好井橋船度人民功德日夜增常生天人中○日日行方便時時發善心○有心無相相逐心生有相無心相隨心滅道慈為萬善之本心若不慈善何以立○非積善陰德不

足以感神○學道者廣行陰德救人危難○與人方便自己方便○積道德者天與之地助之神輔之○楚孫叔敖為兒出遊而還憂而不食其母問故叔敖泣而對曰人言見兩頭蛇者必死兒今日見之恐死無日矣母曰蛇今安在曰恐他人又見之已埋之矣母曰無憂汝不死矣吾聞之有陰德者必有陽報德勝不祥仁除百禍天之處高而聽卑爾必興於楚及長為楚令尹以老終

○宋李謙嘗值歲歉出粟千石以貸鄉人明年又歉人無以償公即對眾焚券曰債已償矣不須復償明年大熟人爭償之一無所受明年又大歉公竭家資

黃弱以濟之動以萬計死者復為瘞之人皆曰子陰德可謂大矣公曰何足為德一日假寐夢有紫衣人告之曰上帝知汝有德及人報在爾後言訖而去後謙壽百歲而終子孫皆為顯官

③宋剡縣陳婆妻少與二子寡居好飲茶茗以宅中有古塚每飲先輟祠之二子患之曰塚何知徒以勞苦欲掘去之母苦禁而止及夜母夢一人曰吾止此塚三百餘年公二子恒欲見毀賴相保護又饗吾佳茗雖潛壞朽骨豈忘翳桑之報及曉於庭內獲錢十萬似久埋者唯貫新母告二子二子慙之從是禱酌愈至母壽至九十餘無疾而終

④宋元祐間嚴州清溪王氏女名亞三性柔慧好行陰騭一日見鷲母為猫所食有宋出巢鷲子三枚每日以飯飼之後長大飛去其冬亞三病死次年春三鷲復來飛遶其屋不已母曰爾非尋亞三否亞三已死葬在後園中欲尋則隨我去母行鷲飛隨後至園母指墓示之鷲飛鳴於墓以背鑽入墓土中皆死

⑤宋徐宗仁西蜀人其鄉有兩石橋夾出一江四時皆湍急下則深淵惟此處可以立渡常年溺死者甚衆蓋舡小觸石即碎宗仁發心造一巨舟兩頭裹以鐵葉自顧篙手專一渡送往來之人且建善緣以薦亡者一日忽有道人登門稱善星命謂徐曰公壽止

三十三徐大驚異其年生日之時夢至官府見王者坐于堂上門首濕衣之鬼約三四百人執一卷投于王前云徐宗仁濟生拔死功德莫大乞與夫妻壽考子孫榮貴王者指左右以此詞示宗仁曰君壽本當盡為此之故可特延三紀覺而異之自此益好善樂施二子三孫皆榮貴宗仁果逾三紀而卒人為立祠于渡側

六晉殷文祥一名道望自稱年已七十而面光白若四十許人曾賣藥於荆州時多疫癘無貴賤皆與之藥所活不可勝數人謂之神醫得一錢即施與貧者又多為橋梁以便往來凡利人之事行之不遺一

謂人曰吾夜見神人謂我有陰德當登仙矣眾疑其矣明日遽辭別往甘露寺北崖遂乘雲而去後十餘年人見在江西賣藥又見在蜀者終莫知所之

七周沈羲者吳郡人也學道於蜀中能消災除病以藥救濟百姓服者立愈功德感天天神識之周赧王十年丙辰老君遣使召隱士沈羲羲一日與妻賈氏共載詣子婦卓孔寧家道逢龍車虎車白鹿車各一乘從騎數十人皆朱衣仗矛帶劍輝赫滿道問羲曰君是道士沈羲否羲愕然答曰是也騎曰羲有功于民心不忘道從生以來履行無過多有陰騭老君今遣仙官相迎侍郎薄延白鹿車是也度世君司馬生

青龍車是也送迎使者徐福白虎車是也須臾三仙
羽衣持節以白玉冊青玉界冊玉字授羲碧落侍郎
羲不能讀遂載昇天時道間耕鋤人共見之須臾大
霧霧解失其所在但見羲所乘車牛在田中食苗以
語羲家子弟遂數百人求之不知羲之蹤跡至後漢
殤帝延平元年凡四百一十二年乃還鄉里推求得
數十世孫名懷喜懷喜曰聞先世祖相傳有祖仙去
竇太后疾嘗遣使請羲安帝時猶在人間後復昇天
八昔王老坊州宜君縣人居村野頗好道愛客務行
陰德其妻亦不倦一旦有縵纒道士造其門王老與
妻俱延禮之居月餘間日與王老言談杯酌甚狎俄

患遍身惡瘡王老求醫藥看療益加勤切而瘡日甚
一日逮將逾年道士謂王老曰此瘡不煩以九藥相
療但得數斛酒浸之自愈於是王老爲之精潔釀酒
既熟道士言以大甕盛酒吾自加藥浸之遂入甕三
日方出鬚髮俱黑而顏復少肌若凝脂王老闔家視
之驚異道士謂王老曰此酒可飲能令人飛上天以
君有陰德濟世吾故言之徐看所釀之酒清冷香美
異常時方打麥王老與妻子并打麥人共飲皆大醉
道士亦飲云欲上天否王老曰願隨師所適於是祥
風忽起彩雲如蒸居舍草樹全家人物鷄犬一時飛
去空中猶聞打麥聲數村人共觀望驚歎唯貓鼠棄

而不去風定打麥二人乃遺在別村樹下後亦不食皆得長年宜君縣西三十里有昇仙村在焉

⑨唐則天末年益州有一老父好行陰德常携一壺於城中賣藥得錢即濟人貧乏如此經歲餘有疾得藥者無不愈每遇有識者必告之曰夫人一身便如一國也人之心即君主也旁列藏府即內輔也外張九竅即外臣也故心有病則內外不可救之但凡欲身之無病必須先正其心不使亂求不使枉思不使嗔怒不使迷惑則心無病而內輔之藏府雖有疾不難療也外之邪竅亦無由受病也况藥有君有臣有佐有使苟或攻其病君先臣次然後用佐用使自然

合其宜如以佐之藥用之以使使之藥用之以佐小不當其用必自亂也又何能攻人之病哉此又像國家任人也老夫賣藥常以此為念每愚者一身君不君臣不臣使九竅之邪恣納以至於良醫無措名藥不効實治身之不得其道故也悲夫士君子記之忽一日獨詣錦江解衣淨浴探壺中唯選一丸藥吞之謂人曰老夫功已滿今歸島上俄化一白鶴飛去衣與藥壺並沒於水

⑩宋右丞錢珣與裴安居近珣病死再宿而活言於妻子曰人召云命已終然平生有陰德不作罪業便再為男子遂去市人畢瑫家託身入見其家雖門戶

低小而物力甚豐其畢氏妻有孕月數足將有所育忽一使者持帖奔至云誤矣合在裴家為男此處非也又隨使者到裴家見其妻使者云當在斯為子緣裴氏月數未滿今且回去云四十日壽當終爾及期而卒裴家是日果產一男容色有似右丞

①宋時有日者苦貧窮問計於得道者答曰向日月邊去日者思之乃明字遂往明州其術盛行後復見得道者問其故答云汝前世於彼開井故也是知衣食有地皆前生所種陰德故今生受之况所積之德有過於開井者耶

②宋王和叔蜀人善醫鄉里道不行入揚州果求者如市有得道者謂曰揚州某處石橋是汝前生造故今生於彼處受福

③宋蜀僧悟詮號覺海有慧性峽州富人程夷伯年二十九一夕夢其父謂曰汝今年當死可問覺海其人茫然不曉一日有僧說相負覺海字程請一相問云我壽幾何覺海曰君年促老僧皆無求但覓水一杯呵氣入水中令程飲之曰今夜有吉夢可相報即夜夢至一官府左廊下男子婦人衣冠嚴整皆相欣悅右廊盡枷鎖縲紲之人哀號涕泗傍有人云左廊是脩捨橋路人右廊是壞毀橋路人若爾要福壽可自擇取程即夢覺發心凡百里之內橋梁路道一一

脩整用工畢覺海復來云汝作此事可延十年裡自是於道路上用工不倦壽遂得九十二五世昌盛

⑤唐范明府者忘其名頗曉術數以選授江南縣宰自課其命云來年秋壽祿俱盡將出京又訪於日者日者曰子來年七月數盡胡為遠官哉范曰某固知之但一女未嫁利薄俸以資遣爾及之任買一婢子因詰其姓氏婢子曰姓張父嘗為某堰官兵寇之亂略賣至此范驚起問其父名乃曩昔之交因謂其妻曰故人之女豈可使為婢悉以女粧奩擇邑客謹厚者配之秩滿歸京日者見之大駭曰子何前相給之甚筭子祿壽俱盡今乃無恙非甲子差謬即當有陰

德為報耳范曰俱無之日者詰問不已范偶以嫁女僕之事告之日者曰此即是矣子之福壽未可量也後果歷官數任而終

⑥宋時邦美陽武人父為鄭州牙校補軍將吏部差押綱至成都時已六十四歲婦方四十餘未有子謂其夫曰我有白金百兩可携至成都求一妾歸莫得子為身後計邦美父至成都訪牙儂見一女甚華麗詰其家世不對窺見以白布總髮恠而問之悲泣曰父本都下人為州掾卒扶攬至此不能歸鬻妾欲辦裝耳邦美父惻然携金往見其母以助其行又為幹行計同上道路中謹事掾妻如部曲至都下僦居葢

殞畢方辭歸妻迎問買妾狀具以實告妻曰濟入危
急為德甚大當更為君圖之未幾妻有孕一夕夢有
數人披衲襖興一金紫人留堂中及且生邦美後舉
進士第一官至吏部尚書

▲嘉言

儒功崇惟志業廣惟勤惟克果斷乃罔後艱○以公
滅私民其允懷○無依勢作威無倚法以削寬而有
制從容以和○其身正不令而行其身不正雖令不
從○其行已也恭其事上也敬其養民也慧其使民
也義○君子學道則愛人小人學道則易使也○以
德服人者中心悅而誠服也○其為政也善因禍而

為福轉敗而為功○當官者先以暴怒為戒事有不
可當詳處之必無不中○當官之法唯有三事曰清
曰慎曰勤知斯三者則知所以持身矣○除天下之
害者受天下之利同天下之樂者享天下之福○教
人者養其善心而惡日消治民者導之敬讓而爭自
息○信在言前者不言而喻誠在令外者不令而自
行○為政以知人為先知人以清心寡欲為本○節
用愛民平獄緩刑天下莫不悅喜○治官莫若平臨
財莫若廉廉平之守不可改也○安民則慧慈民懷
之釋正法治國不邪枉人民○視民如子民奉猶父
○不刑不罰感德從化○惟以德化感人不用鞭撻

使物○弘慈悲之化緩賦而恤貧行至人之教省刑而慎終道法令正於上百姓服於下○教明於上化行於下民有耻心

○漢魯恭字仲康扶風平陵人也自幼習魯詩為諸儒所稱後舉直言拜中牟令恭專以德化為理不任刑罰訟人許伯等爭田累守令不能決恭為平理曲直皆而自責輟耕相讓亭長從人借牛而不還者牛主訟於恭恭令歸之再三不從恭歎曰是教化不行也欲解印綬去父老涕泣留之亭長乃慙悔還牛恭貫不問於是吏人信服建初七年郡國螟傷稼獨不入中牟河南尹袁安聞之遣仁恕掾肥親往廉之恭

隨行阡陌俱坐桑下有雉過止其傍傍有童兒親曰兒何不捕之兒言雉方將雛親瞿然而起與恭訣曰所以來者欲察君之政迹耳今蟲不犯境此一異也化及鳥獸此二異也豎子有仁心此三異也遂歸以自安是歲嘉禾生恭便坐廷中後拜侍御史年八十一卒於家子謙為隴西大守謙子旭官至太僕

○唐韓愈為潮州刺史初至潮問民疾苦皆曰惡溪有鱷魚食民畜產民以是窮數日愈自往視之祭以一羊一豚投溪水而祝之曰昔先王之有天下除虫蛇惡物之為民害者今天子撫有四海愛民如赤子命刺史來守是邦爾鱷魚乃據食民畜熊豕以肥其

身與刺史爭為長雄不可也今與鱷魚約盡三日其
率醜類南徙于海不然是冥頑不靈刺史則選材枝
民操強弓毒矢盡殺乃止其無悔是夕暴風震雷起
溪中數日水盡涸西徙六十里自是潮無鱷魚之患
人感公之德初潮人不知學公興起學校由是多士
彬彬政教大行後召拜國子祭酒長慶四年卒潮人
思公之深立廟歲時享之

③齊張華原公直有信行為兗州刺史下車之初獄
有繫囚千餘人華原料簡輕重隨事決遣至年暮惟
重罪者數十人各給犴五日日期盡速還也囚曰有
君知是何忍背之依期畢至先是州有猛獸為暴自

華原臨政州北七十里甌山中忽有六駮食猛獸咸
以為政化所感卒于官州人大小號慕為樹碑立祠
四時祭焉

④漢孟嘗為合浦太守郡俗採珠以易米時二千石
貪穢求珠自入一夕珠忽徙去合浦無珠餓死者盈
路孟嘗至教化大行一年後去珠復還

▲嘉言

儒刑德合於時則生福詭則生禍○為官刑獄為要
治獄寬恕為先○刑主殺德主生則修德莫若好生
也○治獄多陰德而知其子孫必興○法貴簡而能
禁罰貴輕而必行○不加刑於典法之外不虧恩於

德令之內則受責者莫得與怨荷負者咸思自新所謂威之斯懲宥之斯感懲以致理感以致和○刑者聖人所以愛民之具也其禁暴止殺之意必本乎至仁釋以法理之可護者護可責者責應遣者遣治以正法人民安寧○刑其可刑罰其可罰脫刑罰不中也雖傾財奉佛何以益乎道誅者不怨罪之當也

感應

○漢于公東海郟人為縣獄史郡決曹決獄平允犯法者于公決之一無枉曲百姓為之生立祠東海有孝婦無子守寡侍其姑甚謹姑欲嫁之終不肯姑告隣人曰孝婦養我勤苦哀其無子守寡恐我累及孝

婦奈何若無我則必嫁其後姑自經死姑女告官婦殺我母吏捕孝婦下獄孝婦自誣服具獄上府于公以為此婦養姑十餘年不嫁何肯殺姑太守不聽于公爭之不能得乃抱其具獄哭其府上因辭疾去太守竟論殺之郡中枯旱赤地千里後太守至卜筮其故于公曰孝婦不當死前太守強斷之其谷在此於是太守自祭孝婦冢因表其墓天立大雨歲大收郡人以此大敬重于公其門閭壞父老方共治之于公謂曰少高大門閭令容駟馬高蓋車我治獄多陰德未嘗有冤子孫必有與者至定國為丞相永為御史大夫封侯傳世云

○宋王君貺之父以平生仕宦捧不妄施務從寬恕一夕夢神語之曰爾能慎刑子孫必昌後其子十八人登仕版而君貺又為天下第一

○晉須縣令甚平恕民有姚牛者年十餘父為鄉人所殺牛嘗賣衣物市刀戟圖欲報讎後在縣門前相遇手刃之於衆中吏捕得縣令深矜孝節未忍遽決之既而遇赦又為州郡論救遂得無他令後出獵逐鹿入草草中有古深井數處馬將趣之忽見一翁舉杖擊馬馬驚避不得及鹿令怒引弓將射之翁曰此中有井恐君墮耳令曰汝為何人翁長跪曰民姚牛之父也感君活牛故來謝因忽不見令歎曰吾平生

未嘗欺心妄行凡人有罪者必原其情以求其實今見是翁所云其報我者厚矣即罷獵而還愈加公恕

▲嘉言

德位不期驕祿不期侈恭儉惟德無載爾偽○在上不驕高而不危制節謹度滿而不溢○恭者不侮人儉者不奪人○恭敬搏節福之基也驕狼傲慢禍之始也○儉則心小而為慮者遠侈則心大而為謀者疎○儉德之共也侈惡之大也○救奢必以儉約拯薄無若敦厚○約於全者必有重報於後○約其身以及家儉其家以施國○脩身以寡欲為要行己以恭儉為先○身被一縷常思織女之勞日食三餐每

念農夫之苦。○先知稼穡之艱難，乃逸釋節身時食，清淨自活。○息緣儉務，是至人之大量。○噉蔬菜，澄心神，招慈善，感延年。○鹿衣惡食，約身守節。○量腹而食，無所積藏，度身而衣，不求餘長。○金玉不貴，惟道為珍，約已守節，甘苦樂貧。○節食養胃，清心養神，口腹不節，致疾之因。○道省事之本，在於節用，節用之本，在於去驕。○守其天常，安其命義，食止充虛，衣止禦寒，不苟所得，不棄所有。○取與有節，出入有量。○遠聲色，薄滋味，養形之道也。○樂道而忘賤，安德而忘貧。○欲不適節，則養性知足。○衆人重利，廉士重名。○清貧常樂，濁富多憂。

感應

一吳陸績為鬱林郡守，自奉儉約，罷秩泛海而歸，不載寶貨，舟輕用巨石重之中流，風波橫作，一時同泛者率多漂溺，惟有績舟安流，無恙。舟中一人假寐之際，如見神人往來，舟中若護翼者，且戒舟人毋有恐怖，舟中使君持身清儉，不以一毫干擾於人行，通于天所至，神人護佑之，故時來相報也。既覺言之，果獲安濟。

二後魏高允字伯恭，博通經史，志尚清儉，累居顯貴，不改貧賤，草屋數間，布被緼袍，朝夕所食，鹽菜而已。一夕其子夢有神人告曰：爾父清儉，舉世寡儔，天帝

特命賜粟千石帛千匹以旌之數曰元帝幸其宅觀
允所用歎曰古之清貧豈有比乎賜粟帛一如所夢
之數

▲嘉言

富與貴是人之所欲也不以其道得之不處也貧
與賤是人之所惡也不以其道得之不去也○不義
而富且貴於我如浮雲○君子謀道不謀食○屏欲
而崇德則自然受天遐福○知足常足終身不辱知
止常止終身無耻○知足則樂務貪則憂○知足之
人雖貧是富○少欲之人無求無欲○知足者貧賤
亦樂不知足者富貴亦憂○勿貪麗弊色聲香味觸

也若貪著生愛則為所燒○少欲省事無復經營之
憂乞士任緣寧有積藏之累道知足不辱知止不殆
可以長久○不利貨財不貪世名不以貴為安不以
賤為危○定心寡欲可以服鬼神

感應

○宋呂蒙正字聖功未第時甚貧嘗讀書僧寺中所
居之室夜常有光僧以為蒙正之祥禮待甚厚蒙正
亦自數見光不以為怪夜夢白衣老人指坐榻下語
蒙正曰此有厚藏君當取之既覺了不留意一日鼠
穿榻下地榻沉陷焉蒙正躬治地安榻見黃金一器
白金二器在下蒙正覆之如故不取之亦不言也後

登第累官至左補闕知制誥僧求施錢營造佛寺佛像蒙正曰故時榻下有藏可副所需僧往發之資用悉充乃大德蒙正每且於佛前焚香祝之願蒙正及子孫世世顯貴後蒙正果登宰輔子從簡惟簡承簡行簡務簡居簡知簡皆為顯官其家世世貴顯不絕

②唐李景讓母鄭氏性嚴明早寡家貧居于東都諸子皆幼母自教之宅後古墻因雨墮陷得錢盈缸奴婢喜告母往焚香祝之曰吾聞無勞而獲身之災也天必以先君餘慶矜其貧而賜之則願諸孤他日學問有成乃其志也此不敢取遽命掩而築之三子景讓景溫景莊後皆舉進士弟景讓官至太保鄭不貪

婪而三子鼎貴天報豈吝哉

③唐衢別范元之妻貧焉志讀書盛夏浴于水邊拾得金銀一袋於岸歸謂其子曰世人以財為命萬一彼失此者自經於溝壑枉喪性命將如之何豈且父子携於岸待之果有一婦悲號而至元之詰其故曰夫坐獄當死易田得銀至此失之元之即以還之婦分與亦不受既而鄉里年少無知者反謂其不能取銀經營生理空自守貧元之笑而不答因自歎曰吾平生安分不貪豈可圖他人之財以厚於己而汚吾之名哉識者賢之是年其室產紫芝數莖光彩燁燁人知其為祥瑞也明年父子果登第歷十二世皆為

郡守

④宋葉丞相夢鼎淳祐戊申知袁州仁慈廉謹任滿得替士民攀轅臥轍以留之旗幟甚盛於內綵旗有一聯云關節一毫無地入公廉兩字只天知隨從吏人插於歸舟過袁河口大江中忽大風掣去衆見直上雲霄在空中飛舞亦不見其墜此豈非公廉只天知之驗歟

⑤宋劉留臺少極貧專事趨謁歲久不能自存一日至漳泉市浴堂中拾金一袋浴畢託疾卧堂中終夕不去翌日有一人號泣而來自言爲商于外八年只收得金八十五斤以一袋感之昨晚與同行携到此

浴浴罷乘月行三十里始覺其金不見劉遂舉以還之商以數斤遺之一無所受及還鄉人愈薄之責以拾金不能營生而復來相干劉答曰吾平生賦分止合如此若掩他人物以爲己有是欺心矣必有禍災况商人辛勤所積一旦失去豈不哀哉吾是以還之人皆歎服其義忽一夕夢神人告之曰汝平生安分不貪將有大顯并及汝後嗣劉曰非其所敢望也後果登第官至西京留臺子孫在仕途者二十三人

⑥宋樂平東關民張五即淳熙七年有親戚從假貨物付以一金釵過期不反張自出錢往贖輸息未足還家遣婢雪香持所欠取之既得釵半途登廁慮其

墜也。挿于壁間，溷畢而忘之行。百步始覺，亟回適一弓，手往來其外，即就索焉。拒曰：未嘗見。婢泣告曰：我娘子性嚴急，此係陪錢取典，已自忿躁，更將原物失去，必謂我與人有私，以釵與之，將痛責我，循至死地，未可知也。遂徑趨水濱，弓手懼其赴水，遽呼曰：我實獲釵，本喜為橫財，今乃冷汝就死，我不忍也。即以還之。婢歸言其故，張歎息，語其妻曰：雪香服事十三年矣，無分毫罪過，若因此自盡，可謂至冤，不如分付與人，作一段好事。妻以為然，併與釵以嫁十里外。結竹渡邊，民王二其婦懷弓手恩，恨不問其姓名，尚能略記其形狀。經四年，因往溪頭挈水渡，艇人已滿，載中

一人絕類弓手者，近而扣之，信也。邀還家，其人辭以衣書有限，若遲一渡，便阻五里，不可相從。婦力懇，請與俱行。船即離所，婦及家告其夫，方相與啜茶間，忽聞渡所呼噪喧厲，出視，舩届中流，而覆溪漲正猛，不容奔救。溺死者凡三十六人，惟弓手獨免。

卷之十二 援書

嘉言

儒活千人者，子孫必封。○將百萬之衆，未嘗妄殺一人，其後世必有興者。○好生者，生之徒也。○活數千命，利莫大焉。○我若見彼將被殺害，不捨身命救贖。

其苦則不名為菩薩心。○救一厄難人勝餘一切施。衆星雖有光不如一月明。道能救一夫之命當延一紀之年。

感應

①漢梁皇后少時以列女圖置於左右以自監戒。父商深異之謂諸弟曰我先人全濟河西所活者不可勝數大位不究而積德必報若慶流子孫儻與此女乎選入掖庭後為皇太后臨朝在位十九年族皆榮貴。

②漢鄧禹嘗曰吾嘗將百萬之衆未嘗妄殺一人後世必有興者其後自中興以後累世寵貴九諸侯者

二十九人公二人大將軍以下十三人中二千石十四人列校二十二人州牧郡守四十八人孫女為和帝皇后曾孫女為桓帝皇后信知活人必有厚報。

③漢魏譚字少聞王莽末政亂盜賊起人民相食譚為夷所得等輩數十皆縛束當稍就斃見譚貌謹勅獨放令主炊養有夷長公哀譚謂曰汝者皆以次死哀縱汝急去此譚不肯去叩頭曰我常為諸君主炊養食馨肉肌香餘皆菜食羸瘦肉腥臊不可食我願就烹長公義之即相謂此兒有義可哀縱也賊遂皆放之數十人皆得脫其夕譚夢天神告曰因公好義遂活此數十人上帝命延汝壽二紀後譚果以壽終。

四漢李善字使孫本南陽李元家奴建武中元家人
疫死盡而巨富唯有一孫名續祖尚在孩抱諸奴欲
共害之分其財善乃密負續祖逃避山中哺養乳乃
自生計至年十餘歲出山告縣令鍾離意意悉追其
奴殺之而立續祖光武拜善爲太子舍人後至日南
九真守善後在少室得仙道焉

▲嘉言

儒人情莫不有過過而改之是不過也○過則勿憚
改○智者改過而遷善愚者耻過而遂非遷善則其
德日新遂非則其惡弥積○聖人以改過爲大過而
不改將文過以遂非則有枯終之刑過而能改不戢

過以遠罪則有遷善之美○人之有過失猶身之有
疾病改之以藥石誨之以廉耻雖過失不害爲賢者
雖疾病不失爲全人○事前而恐懼則畏畏可以免
禍事後而恐懼則悔悔可以改過○知過之爲過者
恐懼不敢爲不知過之爲過者殺身而後已○聞善
言則拜告有過則喜有聖賢氣象釋慙頓哽慚銜悲
自責改往脩來不敢復作○知過能改是謂智人○
過由我生改不藉他○前心作惡如雲覆月後心起
善如炬消闇○所生惡欲今當悔過發菩提心利益
衆生道知過必改知善必爲○君子貴遷善遷善也
者聖人之徒歟○過貴乎改過而不改真爲過矣○

其有曾行惡事後自改悔久久必獲吉慶○人誰無
過過而能改善莫大焉○遷善當如風之速改過當
如雷之決

感應

一宋京師人翟楫居湖州四安鎮年五十無子繪觀
世音像懇禱甚至其妻方娠夢白衣婦人以盤擎一
兒甚韶秀妻大喜欲抱取之一牛橫陳其中竟不可
得既而生男子弥月不育又禱請如初有聞其夢者
告楫曰子酷嗜牛肉豈謂是歟楫竦然即誓闔家不
復食遂復夢前婦人送兒至妻抱得遂生子為成人
二宋盛肇凡有延會必殺牛取肉巧作庖饌恣為

樂一夕有扣門者盛肇啟門出視見一蒼頭披髮
蘭展而視之乃大字書云六畜皆前業唯牛取苦辛
但看橫死者盡是殺牛人讀之三過人與簡俱亡盛
肇驚駭自是戒食牛肉

三宋紹興六年三月二十一日平江虎丘山有常州
僧法道因病入延壽堂忽變形作餓鬼頭目極大頸
窄咽青口吐猛火人以食與之則呼曰鐵丸也不可
食如是七日長泐令為請道法師救之謂曰汝生前
想有隱惡急自言佛法容人懺悔我為汝誦咒解釋
病僧久之方自言曰向日在廬山慧日寺作典座盜
常住菜日換酒一升後作江州能仁副院將寬剩米

沽酒有是二罪法師曰汝能知過吾救汝即扶其口灌咒水僧昏然遂睡天明方醒已索湯粥漸進食數日愈

④宋袁州山中有一村院僧不修戒律偶得一布皮戲被於身搖尾掉頭頗克肖之或於道傍戲鄉人皆懼而返走至有遺其所攜之物者僧得之喜漸於要衝伺往來有負販者斂百草中躍出昂然虎也皆棄所齎而奔每蒙皮而出嘗有所獲自以得計時時為之忽一日被之覺其皮著於體及伏草中良久試輒脫之萬方皆不能脫自視其手足布也爪牙布也乃近水照之頭耳眉目口鼻毛尾虎矣非人也心以樂

干草間遂捕狐兔以食之拏攫飲啗皆布也是後常與同類遊處復為鬼神所役使夜則往來于山中寒暑雪雨不得休息甚厭苦之形骸雖虎而心歷歷然人也但不能言耳周歲餘一旦餒甚求無所得乃潛伏道傍忽一人過于前遂躍而噬之既死將分裂而食細視之一衲僧也心自惟曰我本人也幸而為僧不能守禁戒求出輪迴自為不善活變為布業力之大無有是者今又殺僧以充腸地獄安容我哉我寧餓死弗重其罪也因仰天大號聲未絕劃然皮落如脫衣狀自顧其身一裸僧也奔舊院院已荒廢乃用草遮身投于俗家得破衣數件走于隣境佛寺因遊

方止臨川崇壽院衆堂中是時圓超上人居看經堂其侍立不懈上人念其恭勤乃問爾何處人出家幾及臘脩習何等法而勤勤若此對曰某心有悔行願因上人決之但不欲他僧聞耳乃屏侍者問之其言為痴之事叩頭作禮求懺罪業上人謂曰生死罪福皆由念作刹那之間即分天堂地獄豈在前生後世耶爾惡念為痴善念為人豈非證哉苟有志乎脫離者趣無上菩提還元返本念不著則人不為痴痴不為人矣方今閩中大善知識比肩爾其往哉僧乃奉教上人尋話於智作長老長老見之以向者事問皆無異同雙自猶赤耽耽然可畏也後入嶺不知所

適

⑤昔文銖者長安人也父母令於別業讀書為莊前堆阜之上置書堂焉而性本疎誕不樂文字但與隣里少年彈射飛鳥捕格野獸以為戲樂至於答筭之具尉羅之屬弋網置畢弓矢槌刃靡不置之數年之間殺獲不可勝紀忽有道士見之謂曰子之頭何處變耶銖驚而問之乃引於臺下令其窺井照之自見其人形而獸頭矣欲求道士悔謝更令熟視井中頃刻之間身形不改而頭已百變或鳥或獸或蛇或魚銖見之異常憂慎道士曰萬物營營各貪其生至於飛動皆重其命爾反天道而殺之當有此報耳每變

一頭則受一生終爾所殺之數一一償之積月累日計其壽限自此之後爾身則死乃歷生異類之中裁所殺之命百千萬年未有還復人身之日銖號泣求救願焚弋獵之具以謝前愆洗心改悔不敢更犯道士見其誠至乃謂之曰我奉太上之勅歷救衆生之苦名曰救苦真人爾有昔緣早合遇道此苦不救淪陷無期乃以道士衣與之令其終身修道陰功救世廣濟物命方免前罪道士即踊身而起去地數丈立於金蓮華上左執瓊梳右執柳枝金冠鳳履身逾三丈通身有五色之光上連天表照耀一川逡巡乃隱文鉢乃焚羅網之具披道士天衣於其處立殿製

所見之像晝夜精勤焚香懺罪居十餘年又感黃仙授以藥訣令遊行海內救人疾苦後乃得道而去

六昔佛在舍衛國時拘薩羅國波斯匿王勅典獄者諸有盜賊罪應入律詣市殺之時有一賊在大衆中逃竊得脫外假法服私為沙門然內不思惟謂為永離困厄之難不復懼害在閑靜處不思道德不習經義律儀禪誦之道然未得證果不勤求謠果佛告彼人已免生死賊寇之難故有餘恐五威陰身輪迴五趣無有解已為諸結使所見殘害便當墮於餓鬼畜生之道時彼比丘在閑靜處思惟校計內自懇責解知萬物皆悉無常生不久存盡歸於滅興衰之變斯

來久矣即於佛前悔過自責成羅漢道

⑦梁香閣黎止益州青城山寺時俗每至三月三日必往山遊賞多將酒肉酣樂香屢勸之不斷後因三月又如前集香令人穿坑方丈許忽曰檀越等嘗自飲敢未曾與香今日須食一頓諸人爭奉肴酒隨得隨盡若填巨壑至晚曰我大醉飽扶我就坑不爾汚地及至坑所張口大吐雉肉自口出即能飛鳴羊肉自口出即馳走酒食亂出將欲滿坑魚鮮鵝鴨游泳交錯衆咸驚嗟誓斷宰殺自後酒肉永絕上山此香之德風也後因誌公寄語遂化于寺弟子等營墓將殯恠棺太輕及開止見几杖而已

⑧唐揚州白塔寺沙門道昶掌知僧物自在侵用忍有冥官數人白日入房搜昶下地欲斷其頸昶驚叫乞命官厲聲言令房資財並送還僧當放汝活昶叩頭言不敢違命即聲鐘集衆盡捨衣物造像設齋冥官三日復至見昶一鉢一衲不言而去昶自是進脩卒成明行

▲嘉言

儒欲不匱則博施○施小德者受小福施大德者受大福施大而受小者安施小而受大者危施而不受者昌不施而受者亡○與人交有美惡焉施與報而已矣與神交有禍福焉感與應而已矣施報感應若

形影聲響，然以財而施人者，其福可量也；以法而施人者，其福不可量也。○運心常寬廣，此則名為布穀已，慧於人，方可名為施。○若施法師流通大乘講宣，如來秘密之藏，令使大衆開其心眼者，得無量報。○若有貧窮人無財可布施，見他修施時而生隨喜心，隨喜之福報與施等無異。○財施如燈，但明小室法施，若日遠照天下，道施恩不望報，聖賢也。施恩望報者，小人也。

感應

一唐神龍年中，襄陽將鑄佛像，有一老姥至貧，營求助施，卒不能得。姥有一錢，則為女時母所賜也。寶之

六十餘年，及鑄像時，姥持所有，因發重願，投之鑪中。及破鑪出像，姥所施錢着佛胸臆，因磨錯去之。一夕錢又如故，僧徒驚異，遂置錢不去，乃知至誠發心，必有感應。

二宋洛陽民石氏，開茶肆，令幼女行茶，嘗有丐者病，癩垢汚藍縷，直詣肆索飲，女敬而與之，不取錢。如是月餘，每且擇佳茗以待其父，見之怒其不逐，去茗。女不介意，供伺益謹。又數日，丐者復來，謂女曰：汝能啜我殘茶否？女頗嫌不潔，少覆于地，即聞異香，亟飲之，便覺神清體健。丐者曰：我呂翁也。汝雖無緣，盡食吾茶，亦可隨汝所願。或富貴或壽，皆可。女曰：小家

子不識貴止求長壽財物不_乏既去具白父母驚而
尋之已無見矣女既_笄嫁為管管指揮使妻後為吳
王孫女乳母受邑號所乳女嫁高遵約封康國太夫
人石氏壽百二十歲

③昔舍衛國城中有一長者其家大富生一男兒身
體金色相師占省見其奇相即為立字字修越那提
婆華言其生之日家中自然出一井水深廣八尺及
用其水能稱入意一切所須如心即出兒年轉大才
藝博通長者愛之未敢逆意而作是念我子端正容
貌無倫要當推求選擇名女金容妙體類我兒者當
往求之即募諸賈周遍求之時閻婆國有大長者方

生一女子名修跋那蘇婆華言端正非凡身體金色
初生之日亦有自然八尺井水其井所出稱適人意
時彼長者見之亦自念言我女端正要得賢士如我
女比乃當嫁與爾時女名遠布舍衛金天名稱後聞
女家時二長者各懷歡喜求為婚姻娶婦既竟還至
舍衛時金天家便設上供請佛及僧供養一日佛受
其請為長者及金天夫婦廣宣妙法皆獲須陀洹佛
還精舍金天與婦白父母求索出家父母聽許俱往
佛所佛言善來比丘鬚髮自墮法衣著身便成沙門
漸漸教化悉成羅漢佛言過去毗婆尸佛滅後遺法
在_世有諸比丘遊行教化到一村_落有諸人民豪賢

長者見衆僧至各競供養時夫妻二人貧餓困乏每自惟念我父在時財寶積滿今者我身貧困極甚何其苦耶爾時雖富不遭斯等聖衆之僧今既得值無錢供養慘然而啼婦見夫啼而語誓言今汝可往至本舍中於故藏內推覓錢寶當用供養夫如婦言至故藏內得一金錢于時其婦有一明鏡即共同心以用布施買一新瓶盛滿淨水以此金錢著瓶水中以鏡著上持至僧所至心布施於時衆僧即為受之各各取水而用洗鉢後有取水而飲之者時彼夫婦歡喜情悅遇疾命終生初利天時貧人者即此金天夫婦是也

四昔舍衛國有豪貴長者財富無量唯無子息夫婦每懷悵歎禱祀求索精誠歎焉婦生一男端正希有父母宗親值時宴會共相聚進詣大江邊飲食自娛父母將兒詣其會所愛念此兒從坐擔負父母負已竟母復擔之歡娛自樂臨到河邊意卒散亂執之不固失兒墮水尋時搏撮竟不能得父母憐念愛著傷懷其兒福德遂復不死隨水沉浮爲一魚所吞雖在魚腹猶自不死下流村中有一富家亦無兒子種種求索因不能得而彼富家恒令一奴捕生爲業值得吞小兒魚剖腹得兒施大家大家觀省而自慶言我家由來禱祠神祇求索子息精誠報應故天與我即

便摩拊乳哺養之上村父母聞下村長者魚腹得兒
即往其所追求索之言是我兒我於彼河而失是子
今汝得之願以見還時彼長者而答之曰我家由來
禱祠求子今神報應賜我一兒君之亡兒竟無所在
紛紜不了詣王求斷於是二家各引道理其兒父母
說是我兒我於某時失在河中而彼長者復自說言
我於河中魚腹得之此實我子非君所生王聞其說
靡知所如即為二家評詳此事鄉二長者各名此兒
今若與一於理不可更共供養至兒長大各為娶
婦安置家業二處異居此婦生子即屬此家彼婦生
兒即屬彼家時二長者各隨王教兒年長大俱為娶

婦供給所須無有乏短兒白二父母我生已來遭罹
艱苦墮水魚吞垂死得濟今我志意欲得出家唯願
父母當見聽許時二父母心愛此兒不能拒逆即便
聽許往至佛所求欲入道佛言善來頭髮自墮即作
沙門字曰重姓佛為說法得盡諸苦成阿羅漢佛言
過去久遠有佛世尊号毗婆尸集諸大眾為說妙法
時有長者子來至會中聞說大法施戒之福生敬信
心受三自歸及不殺戒復以一錢布施彼佛世世受
福財寶無乏長者子今重姓比丘是也由其施佛一
錢九十一劫恒富錢財至於今世二家父母供給所
須受不殺戒墮水魚吞不能死受三歸故得羅漢果

五昔舍衛城中有大長者婦生一男名曰金財端正殊特是兒手捲父母驚怖即開兩手見二金錢在兒手中歡喜收取轉更續生如是勤取滿藏不盡兒年長大即白父母求索出家即便聽之往至佛所剃除鬚髮身著袈裟臨壇受戒於衆僧前次第為禮隨所禮處兩手按地皆有二金錢受戒已竟精勤修習得羅漢道阿難問佛此金錢比丘先造何福手捲金錢佛言過去九十一劫有佛名毗婆尸出現於世與諸衆僧遊行國界時諸長者施設供養佛及弟子持一貧人取薪賣之時得兩錢見佛歡喜即以兩錢施佛及僧貧人以兩錢施佛及僧故九十一劫恒捲金錢

財寶自然爾時貧人者金錢比丘是也

六昔有三人共賈術各分得五百萬餘有一錢欲與一人則為不平欲破分之事為不然時沙門分術三人共言布施沙門各言大佳手共持與沙門咒願令汝今世後世並得其福共生羅閱國中各得豪富一人主山中採金一人主耕田取金一人主井中汲取金為受前世布施之福

七昔佛在舍衛國祇樹給孤獨園時彼城中有一長者財寶無量選擇族望聘以為婦後生一男兒端正殊妙世所希有其兩手中有金錢出取已還有如是展轉取不可盡召諸相師占相此兒相師覩已此兒

生時有何瑞相父母答言其兩手中_レ有金錢出取已
還生因爲立字名曰寶手年漸長大稟性賢柔慈心
孝順好喜慧施有從乞者伸其兩手有好金錢尋以
施之將諸親友出城觀看漸次遊行到祇洹中見佛
卅尊三十二相八十種好光明普耀如百千日心懷
喜悅前禮佛足合掌請佛及比丘僧慈哀憐愍納受
我供時彼阿難在佛左右問小兒言若欲設供當須
財寶於是小兒聞阿難語尋伸兩手金錢兩落須臾
積聚佛勅阿難汝可取此金錢寶物管理銷餽請佛
及僧阿難受教管理飲食供養訖竟佛爲說法心開
意解得須陀洹果歸白父母求索入道父母愛念不

能違逆將詣佛所求索出家佛即言善來比丘鬚髮
自落法服着身便成沙門精勤修習得阿羅漢果三
明六通具八解脫諸天世人所見敬仰爾時阿難見
是事已前白佛言今此寶手比丘宿植何種生於豪
族大長者家然其兩手有此金錢取已還生值佛卅
尊復獲道果爾時卅尊告阿難言汝今諦聽吾當爲
汝分別解說此賢劫中波羅柰國有佛出世号曰迦
葉教化周訖遷神涅槃時彼國王名曰迦翅收取舍
利造四寶塔時有長者見其豎擘心生隨喜持一金
錢安置塔頂發願而去緣是功德不墮惡趣天上人
中常有金錢伸手而出乃至今者遭值於我出家得

道
昔有天護商主住陸求那國常樂布施於佛生信
欲先入海若安隱還我當於佛法中作五年大會天
人國內無不聞知時有一阿羅漢比丘尼同住彼國
思惟觀察知天護得安隱還作五年大會請一萬八
千比丘皆阿羅漢學人倍多凡夫無數即見上座名
阿婆陀乃是凡夫甚能精進入僧伽藍從此作禮請
上座曰大德甚不端嚴上座心自思惟云何我爲不
端嚴即自觀身見鬚髮長即喚年少剃除鬚髮比丘
尼猶言不端嚴上座更喚年少浣染衣服尼復至僧
伽藍故言不端嚴上座瞋曰我已剃鬚髮及浣染衣

竟云何謂我不端嚴耶比丘尼言佛法以得四果爲
端嚴大德聞商主天護作師子吼五年大會不答言
聞大德是凡夫爲第一上座在羅漢中先受供養
是在嚴不大德方悟啼泣懊惱比丘尼言何故啼泣
答言姊妹我今已老無可堪任比丘尼言如來正法
可見觀者無逾時節大德可往那哆婆多寺就優婆
塞多比丘此比丘佛之所記我弟子中教化第一時
長老比丘至優波笈多出而迎之語言大德洗足消
息答言我未洗足欲見優波笈多時優波笈多弟子
曰大德此即是優波笈多來迎大德即大歡喜便自
洗足優波笈多即教化之爲覓檀越洗浴飲食種種

供養語維那言今有二解脫比丘入坐禪處乃至一萬八千阿羅漢悉入禪處是時比丘入第一禪座處坐時優波芻多入火光三昧如是一萬八千阿羅漢悉入火光三昧比丘見之心生歡喜優波芻多教化說法比丘精進思惟得阿羅漢果還其本國阿羅漢比丘尼往僧伽藍禮拜說言今日大德莊嚴答曰姊妹力也及五年大會天護問上座世尊種種說法上座所說而無有異上座答言於過去世九十一劫我等為商主入海採寶誓取滿船還閻浮提時遇大風吹船墮沙海我等為毗婆尸佛聚沙為塔以珍寶物而供養之時有諸天示我道路言尅後七日有大水

來當汎汝船入閻浮提及至七日果如天言以此沙塔因緣經九十一劫不墮惡道今得阿羅漢果汝今能供養爾許多人於三寶所我說咒願生死無窮汝今可出家天護奉教即為沙門得阿羅漢道
九昔舍衛國有長者生一男兒當爾之時天雨七寶遍其家內相師覩之白長者言兒相殊特生時有瑞應号為勒那提婆華言寶天兒年長大才藝博通聞佛神聖心懷渴仰即辭父母往詣佛所而白佛言願令出家佛言善來鬚髮自墮法衣在身佛為說法即得羅漢毗婆尸佛出現於世有諸居士共請眾僧種種供養時有貧人雖懷喜心無供養具以一把白石擬珠

用散僧衆發大誓願好施貧人今此寶天比丘是乃至九十一劫受無量福多饒財寶衣食自然今遇我世得道果證

十昔大月氏弗迦羅城中有一畫師名曰千那到東方多刹施羅國客盡十二年得三十兩金持還本國於弗迦羅城中聞打鼓作大會聲往見衆僧信心清淨問維那此衆中用幾許物得作一日食維那答曰用三十兩金足得一日食即以所有三十兩金付維那為我作一日食我明日當來空手而歸其婦問曰十二年作得何物答曰我得三十兩金即問金在何所答言已作福田中種子婦言何等福田答言施

與我僧婦乃與夫言論不已適遇斷事大官問以何事故婦言我夫狂癡十二年作得金三十兩不憐憫婦兒盡以施僧大官問其夫汝何不供給婦兒乃以施僧答言我先世不行功德今世貧窮受諸辛苦今世遭遇福田若不種福後世復貧貧相續無得脫時我今欲頓捨貧窮以是故盡以金施衆僧大官元是優婆塞信佛清淨聞是語已讚言是為甚難勤苦得此物盡以施僧汝是善人即脫身瓔珞及所乘馬并一聚落以施貧人而語之言汝始施衆僧衆僧未食是為穀子未種并已得生大果方在後耳以是故言難得之物盡用布施其福最多

十一昔佛在波羅奈國鹿野苑中爾時梵摩達王其婦懷妊足滿十月生一女兒身被袈裟端正殊妙世所希有召諸相師占相此女相師覩已問其父王此女生時有何瑞相父王荅曰此女生時身被袈裟因為立字名迦尸孫陀利年漸長大衣亦隨大稟性賢善慈仁孝順將諸侍衛出城遊戲漸次往到鹿野苑中見佛世尊三十二相八十種好光明普曜如百千日月心懷喜悅前禮佛足却坐一面佛即為其說四諦法心開意解得須陀洹果歸白父王我於今者出城觀看到鹿野苑中見佛世尊百福相好莊嚴其身威儀岸岸容貌可觀願王今者慈哀憐愍聽在道次於時

父王愍此女故不能違逆將詣佛所求索出家佛即告言善來比丘尼頭髮自落法服著身成比丘尼精勤修習得阿羅漢果三明六通具八解脫諸天世人所見敬仰時諸比丘見是事已前白佛言今此迦尸孫陀利比丘尼宿植何福生於豪族有此袈裟著身而生及獲道果爾時世尊告諸比丘汝等諦聽吾當為汝分別解說乃往過去無量世時波羅奈國有佛出世號迦那伽牟尼將諸比丘遊行教化時有王女值行見佛心歡喜悅前禮佛足請佛及僧唯願世尊受我三月四事供養佛即然可三月之中受供養已復以妙衣各施一領緣是功德天上人中尊榮豪貴

常有袈裟隨身而生佛告諸比丘欲知彼時王女者
今孫陀利比丘尼是

十三昔佛在舍衛國祇樹給孤獨園時彼城中有一長
者名曰須達以百千金錢布施於佛而作是念如我
今者財富無量雖以祇洎精舍百千金錢布施佛僧
不足為難今若勸化貧窮下賤減割針線而用布施
乃名為難復得無量無邊功德作是念已即便往白
波斯匿王尋便然可即遣臣佐於其城內擊鼓唱令
語諸人言須達長者今欲勸化衆人以脩慧施於七
日頭乘大白象於四衢道頭街巷里陌處處勸化時
諸人等心懷歡喜競共布施或以衣服瓔珞金銀寶

物種種鏤釧針線隨家所有持用布施爾時有一貧
窮女人客作三月得一張氎規用作衣見須達長者
勸化諸人即便問於其傍諸人彼須達長者多財饒
寶無諸乏少乃能見於地中伏藏今何所乏乃復從
人而行乞索諸人語言今彼長者實無所乏為憐愍
故勸化衆人欲共脩福請佛及僧時此貧女聞是語
已心懷歡喜而作是言由我先世不布施故今若不
施後世遂劇復自思惟佛世難值我今雖欲請佛及
僧悉無所有我今身上唯此一氎若用布施裸形而
坐設不用者後無所望我今貧苦會當歸死寧捨此
氎於窓牖中擲與須達須達得已遣人往看見貧女

人裸形而坐時彼使者而問之言汝今何故用衣布
施貧女答言我畏來世遂更貧劇以是之故持用布
施時彼使者具以事狀往白須達須達聞已歎言奇
哉即脫身上所著服飾用施貧女貧女得已心懷歡
喜我今布施現得華報况將來世豈無報乎遂經數
日貧女命終生初利天

⑬昔有一比丘尼名曰柰女即從座起整服作禮長
跪叉手白佛言我今先世生波羅柰國為貧女人時
世有佛名曰迦葉時與大眾圍遶說法我時在座聞
經歡喜意欲布施願無所有自惟貧賤心用悲感請
他園圃乞求果菜當以施佛時得一柰大而香好擎

一盂水并柰一枚奉迦葉佛及諸眾僧佛知誠意咒
願受之分布水柰一切周普緣此福德壽盡生天得
為天后下生世間不由胞胎九十一劫生柰華中端
正鮮好常識宿命今值世尊開示道眼

⑭昔有一貧家供養道人施與衣食一年便去用一
銅瓶乞主人言是神打此瓶口所索皆得莫請州主
別後貧家遂巨富忘道人囑遂請州主主問富因實
而答主主即奪瓶家轉窮弊方憶道人四出覓見依
實白言道人道故須此瓶乞君一榼盛以杵石賣詣
主門求索瓶也直到主門高聲索瓶主聞大怒遣數
十人欲來捉之開出村石風吹橫空主使人身為此

木石打破頭額復出千人風勢所破死尸塞門主大怖慄求還其瓶其人得瓶家復大富廣作功德死得生天

⑤昔佛在波羅奈國穀米湧貴人民飢饉擔草賣以自活彼有緣覺名曰和理來遊其國我早出城欲擔負草爾時緣覺著衣持鉢入城分衛至於中道吾負草還於城門中復與相遇空鉢而出和理緣覺遙見吾來即自念言吾早入城此人出城今負草還想朝未食吾當隨後往詣其家乞以過飢我時擔草自還其舍下草著地顧見緣覺追吾之後如影隨形我時心念朝出城時見此緣覺入城分衛如空鉢還想未

獲食吾當斷食以奉施之即持食出長跪授之道人愍受其緣覺曰今穀米飢貴人民虛餓分為二分一分著鉢一分自食為應法爾施主報之唯然聖人願徐食之時彼緣覺悉受飯食吾因是德七反生天為諸天王七反在世人之尊因此一施為諸國王長者人民群臣百官所見奉事四輩道俗所見供養自來求吾吾無所須

⑥昔佛在世時舍衛城中有一長者財寶無量其婦生一男兒端正殊妙世所希有當生之日天降大雨父母歡喜舉國聞知相師占善因為立字名耶奢蜜多不飲乳哺其牙齒間自然入功德水用自充足年

漸長大見佛出家得阿羅漢果諸天世人所見敬仰
時諸比丘見是事已請佛為說宿福因緣爾時世尊
告諸比丘此賢劫中有佛出世号曰迦葉於彼法中
有一長者年極老耄出家入道不能精勤又復重病
良醫占之教當服蘇病乃可差尋用醫教取蘇服之
於其夜中藥發熱渴馳走求水水器皆空復趣泉河
並皆枯竭如是處處求水不得深自悔責於彼河岸
脫衣繫樹捨之還來至其明且以狀白師師聞是語
即荅之言汝遭此苦狀似餓鬼汝今可即取我瓶中
水至僧中行即受教取瓶水水盡涸竭心懷憂怖謂
其命終必隨餓鬼尋詣佛所具陳上事而白世尊幸
得道比丘聞已歡喜奉行

為見示佛告比丘汝今當於衆僧之中行好淨水可
得脫此餓鬼之身聞已歡喜即便僧中常行淨水經
二歲即便命終在所生處其牙齒間常有清淨八功
德水自然充足不飲乳哺乃至今者遭值於我出家
得道比丘聞已歡喜奉行

○昔佛在世時迦毗羅衛華言赤澤城中有一長者其家
巨富財寶無量不可稱計生一男兒端正殊妙與衆
超絕其初生時於虛空中天神出現遂自然有一大
幡遍覆城上父母見之歡喜無量因為立字名波多
迦年漸長大求佛出家得阿羅漢三明六通具八解
脫比丘見已便白佛言此波多迦宿植何福生便端

正與衆超絕於虛空中有大幡蓋遍覆城上又值世
尊出家得道佛告比丘乃往過去九十一劫毗婆尸
佛入涅槃後時有王名槃頭求帝收其舍利造四寶
塔而供養之時有一人於彼塔邊施設大會作一長
幡懸著塔上發願而去緣是功德從是以來九十一
劫不隨惡趣天上人中常有六幡覆蔭其上受福快
樂乃至今者出家得道

⑥昔佛在舍衛國祇樹給孤獨園時彼城中有一貧
人名曰拔提爲他守園用自存活每於一日擔一樵
木入城欲賣值城門中見一化人語貧人言汝今若
能持此樵木用與我者我當施汝百味飲食時彼貧

人聞化人語心懷歡喜即便以木授與化人化人答
曰汝今持木隨我後來共詣祇桓即祇園當與汝食時
彼貧人即相隨逐到祇桓中見佛世尊三十二相八
十種好光明普曜如百千日心懷歡喜前禮佛足即
以樵木奉施世尊世尊受已挿著地中佛以神力令
此樵木須臾之間枝條生長華果茂盛團圓可愛如
尼拘陀樹世尊在下結跏趺坐爲諸人天百千萬衆
演說妙法貧人見已心懷喜悅即便以身五體投地
發大誓願以此施佛樵木功德使我來世得成正覺
廣度衆生如佛無異發是願已佛即微笑從其面出
五色光遶佛三匝還從頂入爾時阿難白佛言如來

尊重不妄有笑以何因緣今者微笑唯願世尊敷演
解說佛告阿難汝今見是守園貧人施我樵木不阿
難白言唯然已見彼貧人者以信敬心施我樵木善
根功德於未來世經十三劫不墮地獄畜生餓鬼天
上人中常受快樂最後身得成辟支佛号曰離垢廣
度衆生不可限量是故咲耳爾時諸比丘聞佛所說
歡喜奉行

○昔有大富家食口六人奴婢金銀珍寶不可稱數
佛與阿難街里分衛佛到其門父母兒子妻婦孫息
踊躍歡喜請佛入座以氍毹布地食器皆以金銀佛
言此人前生值飢饉世家中窮乏唯採諸菜用自繫

命作羹適熟外有道人分衛出見沙門父母便言我
分與之兒子孫息各自已分與之讓母令食六人一
時發意各一日不食唯恨家貧無好供養緣此之福
得生天上人中當得安隱豐饒財物以其發意同等
之故世世共作因緣今重相值父母兒子大小一時
皆持五戒命終生天受福無量今日值佛皆得羅漢
○唐元和八年法師智誓與辨悟解絕倫然寡徒侶
偶有著宿閱誓著述乃曰汝識至高頗符佛意今寡
徒衆蓋缺人緣耳佛猶不能度無緣况初心者乎可
辨食布施飛走却後二十年當自有衆誓如其教炊
米散郊外感鳥大集搏飯誓祝曰食吾飯者願為法

侶後二十年，誓往鄴城開講座，座下有衆千餘人，皆年少比丘。

昔有比丘名阿難，白世尊曰：我念宿命生羅閱祇國，為庶民子，身生惡瘡，治之不差。有親友道人來語我言：當浴衆僧，取其浴水以用，洗瘡便可得愈。又可得福。我即歡喜，往到寺中，加敬至心，更作新井香油，浴具洗浴衆僧，以汁洗瘡，尋蒙除愈。從此因緣，斯生端正，金色晃晃，不受塵垢。九十一劫常得清淨，福祐廣遠。今復值佛，心垢消滅，速得應真。

晉焦光字孝然，河東太原人也。在世已百七十歲，常食白石，以分人，狀如煮芋也。日日入山伐薪，以布

施人。先從村頭一家起，周而復始，擔薪以置入門外。人見之時，布席與坐，為設食，光便坐食，亦不與語。若人不見其往，時仍置薪於人門間，便去。連年如此，結草菴於河邊，衣弊即於市中賣薪，以買故衣。著之，冬常單衣，野火燒其庵，人往視之，見光如故，在庵不動。火過去，庵盡，光徐徐起，衣服不焦灼。又更作庵，而忽大雪，没人馬，人屋都壞。村人往視之，不見光所在，疑是庵壓死，乃共抄舉索之。見光卧於雪下，甚有溫顏了無寒色。人知其異，欲從學。道光曰：我且無道也。或忽老忽少如此，二百餘年，乃與人別去。曰：我本神仙，以仙功少，布施之德，故來世間償其願也。言訖不知。

所之云

昔夷道縣向將山下有三泉傳云本無此泉居者皆苦遠汲人多賣水與之有一女子孤窮藍縷無以貿易忽有乞食人衣破貌醜瘡疾竟體村人見之無不穢惡唯此女子獨加哀憐分飯飼之乞食人曰我感汝行善欲思相報汝欲何須女答曰何恩可報今須之物非君能得乞人曰任汝所須曰願此山下有水可汲乞人乃取腰下書刀刺山下三處即飛泉湧出迺便辭去忽然不見

唐韋古字老師疎勒國人身衣毳袍腰懸數百葫蘆頂戴紗巾手持藜杖常以一黑犬同行玄宗時入

中國每施藥餌以救人疾病得莫不愈玄宗重之敬稱為藥王厥後忽謂請藥者曰吾本上仙為有微譴生於異域今以施藥濟人功行已足當歸天上遂叱其犬化為黑龍乘之冲天而去時開元二十五年也

寶曆四年為新羅王曰阿古大皇帝

寶珠院殿光岸壽清覺如大尼善提

其味山為無諸樂之物天而去其開云二十五辛也
坐於異姓今必欲藥醫人依行日只當聽天上多如
辨靈藥玉翅於必購請藥皆曰香本上山為有藥能
中國每欲藥檢必妹人藥藥醫莫不愈宗宗重文醫

比丘 堅慧叟

